

— Այդ սանդալները յիշեցնում են այն կաշուց կազմած հայկական նալակները, որ նկարագրում է Յերոդոտոսը իր պատմության մեջ, եւ որ գործ էին ածում հայերը մի քանի հազար տարի առաջ:

Յերոդոտոսի նկարագրած նալակները, ինչպէս ասաց Ասլանը, բոլորակ ձեւ ունէին եւ զամբիւղի նման ամբողջապէս հիւսած էին ուռնիի ճիւղերից: Ներսիս այդ նալակները պատած էին մորթիներով, եւ ջուրը դժոարութեամբ կարող էր անցնել նրանց մէջ: Նրանք այնքան թեթեւ էին եւ ընդարձակ, որ կարող էին տանել բաւական ծանրութիւններ: Հայոց վաճառականները տեղաւորում էին նրանց մէջ իրանց վաճառքները, նստում էին եւ վեր էին առնում իրանց հետ մի քանի աւանակներ կամ ջորիներ: Եփրատ գետի ընթացքով լողում էին նրանք մինչեւ Բաբելոն: Հասնելով այնտեղ, վաճառում էին տարած մթերքը, յետոյ նալակները քանդում էին, մորթիներն էին միայն վեր առնում, իսկ բոլոր հիւսածքը մի կողմ էին ձգում: Երբ պատրաստում էին վերադառնալ դէպի Հայաստան, մորթիները բեռնում էին ջորիների վրայ եւ ցամաքով ճանապարհ էին ընկնում: Ամէն տեղ նրանք կարող էին պատրաստել նոյնտեսակ նալակներ, որովհետեւ գլխաւոր նիւթը, մորթիները, իրանց հետ ունէին, իսկ ուռնիի ճիւղեր բոլոր գետերի եզերքի մօտ կարելի էր գտնել:

— Ինչո՞ւ եք հեռու գնում մինչեւ Յերոդոտոսի ժամանակները, — մէջ մտաւ Բերգէն-օղլին, — այս տեսակ նալակներ գործ են ածում մինչեւ այսօր հայերը Եփրատի եւ Տիգրիսի ջրերի վրայ, այն զանազանութեամբ միայն, որ մորթիների փոխարէն իրանց զամբիւղաձեւ նալակները պատում են կաշիով, որովհետեւ հիմա սովորել են կաշու պատրաստութիւնը:

Նաւահանգստում կային մի քանի նալակներ եւս նոր ձեւով, որոնց մէջ իր գեղեցկութեամբ եւ յարմարութեամբ առաջին տեղը բռնում էր Բերգէն-օղլու նալակը: Նա ցոյց տոեց իր նալակը, ասելով.

— Այդ այն արհեստաւորի գործն է, որ այժմ բանում է իմ տանը: Նա ընդունակ է մինչեւ անգամ թեթեւ առագաստաւոր նաւեր կառուցանելու: Այդ արհեստով նա երկար ժամանակ աշխատել է Կ. Պոլսի նաւահանգիստներում: Սաստիկ դիւրաշարժ է այդ նալակը. նրան կարելի է կառավարել ինչպէս մի լաւ վարժած նժոյգ ձի:

Բերգէն-օղլին մնաց նաւահանգստում, իսկ մենք վերադարձանք գիւղը: Ասլանը վարպետ Փանոսի հետ գնացին մի քանի հիւանդներ տեսնելու (գոնէ այդպէս ասացին ինձ), բայց ես գնացի մեր հիւրընկալի տունը: